

四庫全書

子部

欽定四庫全書

冊府元龜卷四百三十六 宋 王欽若等 撰

將帥部

繼襲

夫五材竝用去兵之甚難四國于蕃謀帥之為重中葉而下乃有父死子繼兄終弟及代領其衆以濟厥功者矣若夫世篤忠烈家傳武畧績乃舊服嗣專征之柄聿脩厥德振象賢之業克嗣前烈不隕家聲者斯可稱焉

至於雖讀父書未練軍政紆恩澤之拜總麾符之重徒藉世資非繇德舉茲亦膠柱調瑟之謂歟

吳孫瑜漢末為奮威將軍領丹陽太守為衆所附至萬餘人建安二十年瑜卒時弟皎為征虜將軍督夏口又并其軍皎善於交結委廬江劉靖以得失江夏李允以衆事廣陵吳碩河南張梁以軍旅傾心親待莫不自盡二十四年皎卒弟奐代統其衆以揚武中郎將領江夏太守在事一年遵皎舊迹禮劉靖李允吳碩張梁及江

夏閭舉等竝納其善嘉禾三年與卒子承嗣以昭武中
郎將代與統兵領郡赤烏六年承卒無子庶弟壹奏與
後襲業為將

孫賁漢末為征虜將軍領豫章太守在官十一年卒子
鄰嗣字公達雅性精敏幼有令譽九歲代領豫章在郡
垂二十年討平叛賊政績脩理

凌操為破賊校尉從大帝討夏口中流矢死子統年十五
左右多稱述者帝亦以操死國事拜統別部司馬行破

賊都尉使攝父兵統卒二子烈封年各數歲帝內養於宮後追錄統功封烈亭侯還其故兵烈有罪免封復襲爵領兵

孫河為將軍屯京城時丹陽太守孫翊遇害河馳赴宛陵為都督矯覽郡丞戴員所殺河子韶年十七收河餘衆繕治京城起樓櫓脩器備以禦敵大帝聞亂從椒丘還過丹陽引軍歸吳夜至京城下營試攻驚之兵皆棄城傳檄備警謹聲動地頗射外人帝使曉諭乃止明日見

詔甚喜之即拜承烈校尉統河部曲食曲阿丹徒二縣
置長吏一如河舊

步隲為驃騎將軍都督西陵二十年鄰敵敬其威信亦
烏十一年卒子協嗣統隲所領加撫軍將軍協卒子璣
嗣侯協弟闡繼業為西陵督加昭武將軍封西亭侯

諸葛瑾為大將軍領豫州牧赤烏四年卒子融代父攝
兵業駐公安部曲吏士親附之疆外無事

朱績為建中都尉叔父才卒績領其兵

朱桓為前將軍領青州牧以恚恨遂托狂發詣建業治病使子異攝領部曲桓卒異拜都騎都尉代桓領兵

陸遜為上大將軍卒子抗時年二十拜建武校尉領遜衆五千人送葬東還詣都謝恩抗累遷大司馬荊州牧鳳皇三年卒子晏及弟景玄機雲分領抗兵晏為裨將軍夷道監景為偏將軍中夏督機為牙門將

全綜為綏南將軍領東安太守嘉禾十二年卒子懌嗣襲業領兵

鍾離牧為前將軍領武陵太守卒官子禕嗣代領兵
晉羅憲為陵江將軍監巴東軍事領武陵太守泰始六
年卒子襲為陵江將軍統其父部曲至廣漢太守

王遜為南夷校尉寧州刺史卒遜在州十四年州人復立
遜中子堅行州府事詔除堅為南夷校尉寧州刺史假節
魏浚為揚威將軍假河南尹為劉曜所得遂死之族子
該領其衆懷帝以該為武威將軍統城西雍涼人使討
劉曜成帝時卒從子雄統其衆

祖逖為奮威將軍豫州刺史卒於雍丘以逖弟約代領其衆

周訪為南中郎將督梁州諸軍梁州刺史大興三年卒子撫督梁州之漢中巴西梓潼陰平四郡軍事加進鎮西將軍在州三十餘年興寧三年卒子楚監梁益二州假節世在梁益甚得物情太和中梁州刺史楊亮失守楚遣其子瓊討平之是歲楚卒瓊代楊亮為梁州刺史建武將軍領西戎校尉桓溫以梁益多寇周氏世有威

稱復除撫弟光子仲孫監梁豫益州之三郡自訪以下
三世為益州四十一年

邵續為平北郡將軍假節冀州刺史後為石季龍所得
元帝既聞續沒下詔曰邵續忠烈在公推誠慷慨綏集
荒餘憂國忘身功勲未遂不幸陷沒朕用悼恨於懷所統
任重宜時有代其部曲文武已共推其息緝為營主續
之忠誠著於公私今立其子足以安衆一以續本位即
授緝使總率所統效節國難雪其家仇

宋檀祗晉末從高祖克京城參建武軍事至羅落橋從父建武將軍憑之戰沒之後乃以憑之所領兵配祗京邑既平參領軍將軍事

梁夏侯夔為持節督豫淮陳穎建霍義七州諸軍事豫州刺史有部曲萬人馬二千匹竝服習精強為當時之盛大同四年卒子譚領其父部曲為州助防刺史

陳歐陽頔長沙臨湘人有聲南土蕭勃死後嶺南擾高祖授頔安南將軍衡州刺史始興縣侯未至嶺南頔子

紇已尅定始興及顏至嶺南皆攝伏仍進廣交越成定
明新高合羅愛建德宜黃利安石雙十九州諸軍事鎮
南將軍平越中郎將廣州刺史紇頗有幹畧天嘉中除
黃門侍郎員外散騎常侍累遷安遠將軍衡州刺史襲
封陽山郡公都督交廣等十九州諸軍事廣州刺史在
州十餘年威惠著於百越

程靈洗為安西將軍都督郢巴武三州諸軍事郢州刺
史子文季果決有父風弱冠從靈洗征討必前登陷陣

領中直兵出為臨海太守及靈洗卒文季盡領其衆起為超武將軍

胡穎為左將軍吳興太守弟鑠亦隨穎將軍天嘉元年穎卒鑠統其衆歷東海豫章二郡太守

徐度為鎮南將軍湘州刺史以其子敬成監郡天嘉四年度自湘州還朝士馬精銳敬成盡領其衆隨章昭達征陳寶應晉安平除貞武將軍豫章太守

後魏長孫嵩代人父仁昭成時為南部大人嵩寬雅有

器度年十四代父統軍

皮豹子為都督秦雍荆梁益五州諸軍事開府仇池鎮將豹子子喜孝文初拜侍中都督秦雍荆梁益五州諸軍事開府仇池鎮將以其父豹子昔鎮仇池有威信故也

後周王思政為大將軍陷於東魏其子康沉毅有度量後為太祖親信思政陷後詔以因水城陷非戰之罪增邑三千五百戶以康襲爵太原公除驃騎大將軍侍中

開府儀同三司十六年王師東討加康使持節大都督以思政所部兵皆配之

李遷哲為大將軍率金上等諸州兵鎮襄陽建德三年卒子敬猷還統父兵起家大都督累遷大將軍

唐李抱玉寶應中為澤潞陳鄭節度使從父弟抱貞以澤州刺史為節度留後凡八年抱玉卒抱貞仍領留後德宗即位拜檢校工部尚書充昭義軍節度等使

田神功為宋州節度使大歷元年入覲二月宋州兵叛

盜官庫財物而潰神功歿於京師以神功之弟曹州刺史神玉權知汴州留後

田承嗣為魏博等州節度使大歷十三年卒從子悅為中軍兵馬使勇冠三軍承嗣愛其才及將卒命悅知軍事代宗用悅為節度留後尋加魏博等七州節度使興元元年承嗣子緒殺悅後奔出北門大將曹俊孟希祐等領從數百追及之遙呼之曰節度使須郎君為之他人固不可也乃以緒歸衙推為留後德宗因授緒魏博

節度使貞元十二年卒子節度副使季安年纔十五軍人推為留後德宗因授節度使

李正己為平盧淄青節度等使建中二年卒子節度觀察留後納檀總兵政興元元年四月歸順詔加檢校工部尚書充平盧淄青節度等使貞元八年納死軍中以納子青州刺史師古代其位而上請德宗因授起復右金吾大將軍同正員充平盧及青淄齊節度等使

南承宗為徐海沂密都團練觀察使興元元年卒以其

子明應起復知軍事

劉怦為幽州節度使長子濟以兼御史中丞充行軍司馬貞元元年怦卒軍人習河朔舊事請濟代父為帥德宗從之累加檢校兵部尚書

程日華為橫海軍使檢校工部尚書兼滄州刺史貞元二年卒其子兵馬使試殿中監懷直自知留後事朝廷嘉父之忠起復授檢校工部尚書權知橫海軍事尋授節度使懷直荒於畋獵數日方還其從父兄懷信因衆怒閉

門不內懷直因來朝覲除龍武統軍懷信代為橫海軍節度支度營田滄景觀察留後十三年九月正授節度使二十一年七月卒以其子副使兼御史中丞大夫執恭為起復左驍衛將軍滄州刺史橫海軍節度使

張孝忠為義武軍節度易定滄等州觀察使子昇雲以父蔭官累至檢校工部尚書貞元七年孝忠卒德宗以邕王諒為義武軍節度使以昇雲為定州刺史充節度觀察留後賜名茂昭九年正授節度使

張建封為徐泗濠節度等使貞元十六年卒判官鄭通誠權知留後使軍衆請於朝廷乞授建封子愔旄節乃割濠泗二州隸淮南授愔起復右驍衛將軍同正兼徐州刺史充本州團練使順宗初正授武寧軍節度使

王武俊為成德軍節度使長子士真以檢校工部尚書為副使貞元十七年武俊卒士真充成德軍節度鎮冀深趙德棣等州觀察等使長子承宗以御史大夫為副大使元和四年士真卒三軍推承宗為留後請割德棣

二州上獻乃授成德軍節度使

李愿元和末為武寧軍節度使到鎮會鄆帥不恭奉命
攻討屠城下邑繼有所聞朝廷甚多之無何有疾召以
其弟愬代領其任

田弘正為魏博等州節度使穆宗初鎮州王承宗卒以
弘正為成德軍節度使明年七月軍亂遇害時弘正子
布自河陽三城節度移鎮涇原乃急詔布至起復為魏
博節度使乘傳之鎮

劉悟為昭義軍節度使寶歷元年卒遺表請以其子從
諫繼續戎事敬宗下大臣議僕射李絳以澤潞內地與
河北三鎮事理不同不可許宰相李逢吉中尉王守澄
曲為奏請自將作監主簿起復金吾大將軍充昭義節
度副大使觀察等留後二年加金吾大將軍充昭義節
度等使

王廷湊為成德軍節度使子元逵為鎮州右司馬兼都
知兵馬使太和八年十一月廷湊卒三軍推元逵主軍

事請命於朝乃起復檢校工部尚書充成德軍節度使
子紹鼎為節度副使鎮州左司馬知府事大中十一年
二月元逵卒授紹鼎起復檢校工部尚書充成德軍節
度使其年七月卒子景崇為嫡時年幼宣宗以昭王
洸為成德軍節度副使以紹鼎弟鎮府左司馬知
府事紹懿為御史中丞充成德軍節度觀察留後尋正
授節度使歲餘卒初紹懿既立以景崇為都知兵馬使
督府左司馬知府事及紹懿數月疾篤召景崇謂之曰

亡兄以軍政托予比俟汝成立今危懼如此殆將不救
汝雖年幼勉自負荷下禮藩鄰上奉朝旨俾吾兄家業
不墜惟汝之才也言已而卒時監軍在席具奏其治命
宣宗嘉之詔授檢校右散騎常侍充成德軍節度觀察
留後尋正授節度使中和二年十一月卒子鎔始十歲
三軍推為留後行軍司馬竇權夷與三軍等進奏曰臣
等有狀詣監軍院請故使男節度副使鎔權知軍府事
尋蒙監軍使李彥融列鎔所請勾當訖僖宗因授旄鉞

檢校工部尚書

何進滔為魏博節度使開成初卒子弘敬襲其位文宗就加節制咸通初卒子全皞嗣之懿宗尋降符節子孫相繼四十餘年

張仲武為盧龍軍節度使大中元年卒子直方以節度副使襲父位

張允伸為盧龍軍節度使大中十三年卒允伸領鎮凡二十三年子簡會以節度副大使檢校工部尚書權主留後

李全忠光啓初為盧龍軍節度使尋卒子威自襲父位
稱留後

韓允中為魏博節度使乾符元年卒子簡自節度副使
檢校工部尚書起復為節度觀察留後踰月正授節度
使

王重榮為河中節度使光啓三年六月為部下常行儒
所害行儒推其弟重盈為帥太原節度使隴西郡王

後唐

武表聞僖宗授以旄鉞乾寧初重盈卒軍府推重榮兄

重簡子行軍司馬珂為留後尋授節度使

趙犖為忠武軍節度使大順中卒初犖以仲弟昶為防
遏都指揮使同心王事共力軍功乃下令盡以軍州事
付於昶遂上表乞骸詔授昶兵馬留後數月犖卒昶遷
節度使乾寧三年卒昶弟翊自行軍司馬知忠武軍留
後尋正授節度使

王處存為義武軍節度使乾寧二年九月卒三軍以河
朔舊事推其子副大使部為留後朝廷從而命之授以

旄鉞光化三年部奔太原三軍推處存母弟處直為留

後汴帥

梁太祖

表授旄鉞

羅弘信為魏博節度使光化三年遇旱雩祭於郭璞祠
暴卒八月制以弘信子節度副使紹威起復雲麾將軍
充本軍兵馬留後尋授節度使紹威梁開平中卒子周
翰繼為魏博節度使

孟方立為邢洺節度使龍紀元年六月卒三軍推其弟
洺州刺史遷為留後

後唐李仁福世為夏州牙將本拓跋氏之族拓跋思敬
唐僖宗時為夏州節度使破黃巢有功賜姓李氏思恭
卒弟思諫繼之開平二年思諫卒三軍立其子彝昌為
留後尋起復正授旄鉞三年彝昌遇害時仁福為蕃部
都指揮使本州軍吏迎立為帥梁祖降制授定難軍節
度使長興四年卒子彝超嗣明宗制授定難軍節度使
清泰二年卒弟彝興時為夏州行軍司馬三軍推為留
後末帝聞之正授定難軍節度使彝興乾德五年卒子

光叡繼其位

韓遜為靈武節度梁貞明初卒三軍推其子洙為留後
末帝聞之起復正授靈武節度使天成四年卒朝廷以
其弟澄為朔方軍節度觀察留後

李茂貞為鳳翔節度使同光二年卒遺奏其長子彰義
軍節度使從曦知鳳翔軍府事莊宗詔起復授鳳翔節
度管內觀察處置等使

高萬興為彰武保大兩鎮節度使同光三年十二月卒

於位以其子保大軍馬步軍都指揮使允蹈權典留後
天成初起復檢校太傅充延州節度使長興初允蹈移
鎮邢州堂弟允權以膚施令罷歸延州漢高祖即位初
郡兵逐其帥周密以允權知留後事尋拜節度使

高季興為荆南節度使天成二年卒以其子行軍司馬
從誨知軍府事明宗尋命起復授荆南節度使漢乾祐
元年卒子保融嗣其位保融建隆元年卒保勗自行軍
司馬襲保勗四年卒保融子繼冲襲

馬殷為湖南節度使長興二年卒初殷既病差教練使
歐弘奏云臣病疾多時不任公事乞以男武順軍節度
副使充洪鄂等道四面行營副都統希聲充本鎮節度
使明宗降制以希聲為潭州大都督府長史克武安靖江等
軍節度湖南管内觀運等使希聲未周歲又卒三軍又立
其弟朗州節度使希範知留後事襲位明宗制授武安
軍節度使漢初薨於位子岳奴年幼希範弟節度副使
希廣襲其位漢高祖制授檢校太師兼中書令克武安

軍節度使

錢鏐為吳越國王長興三年薨其子元瓘時為鎮海鎮東等軍節度使兼中書令先是鏐既年鏐欲立嗣召諸子使各論功皆讓於元瓘及鏐病篤召將吏於庭謂之曰予病不起矣吾兒皆懦弱不能與爾將吏為帥與爾輩訣矣須當自擇將吏號泣言曰大令公有軍功多賢行仁孝已領兩鎮王何苦言及此鏐曰此渠定堪否曰眾等願奉賢帥即出管鑰數箱於前謂其子元瓘曰三

軍言嗣可奉領取此物鏐堯元瓘遂襲父位四年遣將作監李錯起復元瓘官爵晉天福六年堯子佐襲父位漢初以疾薨弟侗襲位未踰年為大將胡進思所逐遷於別第以甲士援送幽於義和院時侗異母弟倂為温州刺史衆既無帥進思即迎倂立之乾祐元年授檢校太師兼中書令充鎮海鎮東等軍節度使

晉曹議金為歸義軍節度瓜沙等州觀察等使天福五年二月卒以其子元德襲其位

折從阮為永安軍節度武勝等州觀察等使乾祐二年
舉族入覲少帝命其子德辰為府州團練使授從阮武

勝軍節度使

周馮暉為靈武節度使廣順二年卒子繼業朔方衙內
都虞候暉亡三軍請知軍府事因授檢校太保充朔方
兵馬留後

冊府元龜卷四百三十六

欽定四庫全書

子部

冊府元龜卷四百

三十七至
四十

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣孫梅

謄錄監生臣莊承簪

欽定四庫全書

冊府元龜卷四百三十七

宋 王欽若等撰

將帥部

強復 夫士心

強復

夫自任則小前訓攸非復諫不從昔賢深戒矧夫握兵之
要為人司命而冒臆是縱狼戾自專為識者之所非冒兵
家之所忌而行之自若處之不疑至於敗事失機莫之知

悔恃勇尚勝蓋其有素斯亦將將之道所宜深察者也

荀瑤為晉大夫帥師圍鄭未至鄭駟弘曰知伯悞而好

勝早下之則可行也

行去也

乃先保南里以待之

保守也南里在

城外知伯入南里門於桔秩之門鄭人俘鄴魁壘

鄴魁壘晉士

賂以致政

欲使反為鄭

閉其口而死將門

攻鄭門

知伯謂趙孟

入之對曰主在此

主謂知伯也言主在此何不自入

知伯曰惡而無勇

何以為子

惡貌醜也簡子廢嫡子伯魯而立襄子故知伯言其醜且無勇何故立以為子對曰

以能忍耻庶無害趙宗乎知伯不悞趙襄子由是慕知

伯甚毒也遂喪之知伯貪而愎故韓魏反而喪之

後漢呂布為左將軍故琅邪相蕭建為臧霸所襲破得
建資實布聞之自將步騎向莒高順諫曰將軍攻殺董
卓威震夷狄端坐顧眄遠近自然畏伏不宜輕自出軍
如或不捷損名非小布不從霸畏布引還抄暴果登城
固守布不能拔乃引還下邳順每諫布言凡破家亡國
非無忠臣明智者也但患不見用耳將軍舉事不肯詳
思輒喜言誤誤不可數也布知其忠然不能用

袁紹為冀州牧與曹公相拒於官渡許攸說紹曰公無與曹相攻也急分諸軍持之而徑從他道迎天子則事立濟矣紹不從曰吾自當先圍取之張郃又說紹曰公雖連勝然勿與曹公戰也密遣輕騎鈔絕其南則兵自敗矣紹復不從之紹後果敗

周慎為車騎將軍張溫裨將溫討邊章章敗走溫遣慎將三萬人追擊之叅軍事孫堅說慎曰賊城中無穀當外轉糧食堅願得萬人斷其運道將軍以大兵繼後賊

必困乏而不敢戰若走入羗中并力討之則涼州可定也慎不從引軍圍榆中城而章遂分屯圍峽反斷慎運道慎乃棄輜重而退

魏曹休為大司馬征吳於夾石口瑯邪太守孫禮諫以為不可深入不從而敗

蜀關羽為前將軍攻曹仁於樊降于禁等威震華夏孫權遣使為子索求羽女羽罵辱其使不許婚權大怒

曰羽圍樊權遣使求助之敕使莫速進又遣主簿先致命於羽羽忿其淹遲又自己得于禁等乃罵曰貉子敢

爾如使樊城拔吾不能滅汝耶
權聞之知其輕已偽手書以謝

馬謖為諸葛亮叅軍亮伐魏拔謖統大衆在前謖舍水上山舉措煩擾牙門將王平連規諫謖謖不能用大敗於街亭

姜維為衛將軍議欲出軍伐魏征西大將軍張翼庭爭以為國小民勞不宜黷武維不聽將翼等行進翼位鎮南大將軍維至狄道大破魏雍州刺史王經經衆死於洮水者以萬計翼曰可止矣不宜復進進或毀此大功

維大怒曰為蛇畫足維竟圍經於狄道城不能克自翼
建異論維心與翼不善然常牽率同行翼亦不得已而
往

吳朱桓為前軍性護非耻為人下每臨敵交戰節度不
得自繇輒嗔恚憤激

諸葛恪為荆揚二州牧督中外諸軍事恪有輕敵之心
與魏戰克復欲出軍諸大臣以為數出罷勞同辭諫恪
恪不聽中散大夫蔣延或以固爭扶出恪乃著論諭衆

意曰夫天無二日土無二王王者不務兼并天下而欲
垂祚後世古今未之有也昔戰國之時諸侯自恃兵強
地廣互有救援謂此足以傳世人莫能危恣情縱懷憚
於勞苦使秦漸得自大遂以并之此既然矣近者劉景
升在荊州有衆十萬財穀如山不及曹操尚微與之力
競坐觀其強大吞滅衆袁北方都定之後曹操率三十
萬衆來向荊州當時雖有智者不能復為畫計於是景
升兒子交臂請降遂為囚虜凡敵國欲相吞即讐欲

相除也有讐而長之禍不在已則在後人不可不為遠慮也昔伍子胥曰越十年生聚十年教訓二十年之外吳其為沼乎夫差自恃強大聞此邈然是以誅子胥而無備越之心至於臨敗悔之豈有及乎越小於吳尚為吳禍況其強大者邪昔秦但得關西耳尚以并吞六國今賊皆得秦趙韓魏燕齊九州之地地悉戎馬之鄉士林之藪今以魏比古之秦土地數倍以吳與蜀比古六國不能半之然今所以能敵之但以操時兵衆於今適

盡而後生者未悉長大正是賊幼小未盛之時加司馬懿先誅王凌續自隕斃其子幼弱而專彼大任雖有智計之士未得施用當今伐之是其厄會聖人急於趨時誠謂今日若順衆人之情懷偷安之計以為長江之險可以傳世不論魏之終始而以今日遂輕其後此吾所以長歎息者也自本朝來務在產育今者賊民歲月繁滋但以尚小未可得用耳若復十數年後其衆必倍於今而國家勁兵之地皆已空盡唯有此見衆可以定事

若不早用之端坐使老復十數年畧當損半而見子弟
數不足言若賊衆一倍而我兵損半雖復使伊管圖之
未知如何今不達遠慮者必以此言為迂夫禍難未至
而豫憂慮此固衆人之所迂也及於難至然後頓顙雖
有智者又不能圖此乃古今所病非獨一時昔吳始以
伍員為迂故難至而不可救劉景升不能慮十年之後
故無以詒其子孫今恪無具臣之才而受大吳蕭霍之
任智與衆同思不經遠若不及今日為國斥境俛仰年

老而讐敵更強欲刎頸謝責寧有補邪今聞衆人或以
百姓尚貧欲務閑息此不知慮其大危而愛其小勤者
也昔漢祖時已幸有三秦之地何不閉關守險以自娛
樂空出攻楚身被瘡痍介胄生蟣虱將士厭困苦豈甘
鋒刃而忘安寧哉慮於長久不得兩存者耳每覽荆邯
說公孫述以進取之圖近見家叔父表陳與賊爭競之
計未嘗不喟然歎息也夙夜反側所慮如此故聊疏愚
言以達二三君子之末若一朝隕沒志或不立貴令來

世知我所憂可思於後衆皆以恪此論欲必為之辭然
莫敢復難初滕胤與恪俱受遺詔輔政恪將悉衆伐魏
胤諫恪不如按甲息師觀隙而動恪曰諸云不可者皆不
見計算懷居苟安者也而子復以為然吾何望乎夫以
曹芳闇劣而政在私門彼之臣民固有離心今吾因國
家之資藉戰勝之威則何往而不克哉於是遣衆出軍
始失人心

晉劉琨為并州都督屬石勒攻樂平太守韓據請救於

琨而琨自以士衆新合欲因其銳以威勒箕澹諫曰此
雖晉人久在荒裔未習恩信難以法御今內收鮮卑之
餘穀外抄殘胡之牛羊且閉關守險務農息士既服化
感義然後用之則功可立也琨不從悉發其衆命澹領
步騎二萬為前驅琨自為後繼勒先據險要設伏以擊
澹大敗之一軍皆沒

苟晞為大將軍刑政苛虐縱情肆欲遼西閭亨以書固
諫晞怒殺之晞從事中郎明預有疾居家聞之乃舉病

諫晞曰皇晉遭百六之數當危難之機明公親稟廟筭將為國家除暴閭亨美士奈何無罪一旦殺之晞怒曰我自殺閭亨何關人事而舉病來罵我左右為之戰慄預曰明公以禮見進預欲以禮自盡今明公怒預其若遠近怒明公何昔堯舜之在上也以和理而興桀紂之在上也以惡逆而滅天子且猶如此況人臣乎願明公且置是怒而思預之言晞有慚色

甘卓為安南將軍梁州刺史鎮襄陽王敦搆兵卓露檄

遠近率所統致討次猪口王師敗績卓徑還襄陽何無
忌及家人皆勸令自警卓轉更狠愎聞諫輒怒方散兵
使人佃而不為備功曹榮建固諫不納襄陽太守周慮
等密承敦意知卓無備詐言湖中多魚遣卓左右皆捕
魚乃襲害卓於寢傳首於敦

庾亮為中書令蘇峻之役假節督諸軍司馬陶回謂亮
曰峻知石頭有重戍不敢直下必向小丹陽南道步來
宜伏兵要之可一戰而擒亮不從峻果繇小丹陽經秣

陵迷失道逢郡人執以為鄉導時峻夜行甚無部分亮聞之深悔不從回言

殷浩為揚州刺史與桓溫不協時王羲之以國家之安在於內外和同因與浩書以戒之浩不從及浩將北伐羲之以為必敗以書止之言甚切至浩遂行果為姚襄所敗

劉毅為衛將軍時何無忌為盧循所敗賊軍乘勝而進朝廷震駭毅具舟船討之將發而疾篤內外失色朝議

欲奉乘輿北就中軍劉裕會毅疾瘳將率軍南征裕與毅書曰吾往與妖賊戰曉其變態今脩船垂畢將居前撲之尅平之日上流之任皆以相委又遣毅從弟藩往止之毅大怒謂藩曰我在一時之功相推耳汝便謂我不及劉裕也投書於地遂以舟師二萬發姑孰次桑落州與賊戰敗績

宋王玄謨為寧朔將軍伐魏受輔國將軍蕭斌節度玄謨向碣磔戍主奔走遂圍滑臺積旬不克魏率大衆號

百萬鞞鼓之聲震動天地玄謨軍衆亦盛器械甚精而
玄謨專仗所見多行殺戮初圍城城多茅屋衆求以火
箭燒之玄謨恐損亡軍實不從城中即撤壞之空地以
為窟室及魏救將至衆請發車為營又不從將士多離
怨遂敗

蕭思話為青州刺史時到彥之北伐大敗魏軍乘勝破
青部諸郡國思話欲委州保險濟南太守蕭順之固諫
不從思話失據潰走

南齊胡諧之為中庶子西討巴東王子響詔以鎮軍張欣泰為副欣泰謂諧之曰今太歲在西南逆歲行軍兵家深忌若且頓軍夏口宣示禍福可不戰而擒也諧之不從進據江津尹畧等見殺

梁李奉伯為益州中兵叅軍時巴西人雍道晞率羣賊逼郡刺史劉季連遣奉伯討擒之奉伯因獨進巴西之東鄉討餘賊李膺止之曰卒情將驕乘勝履險非良策也不如少緩更思後計奉伯不納悉衆入山大敗而出遂

奔還州

曹景宗為鎮軍將軍為人自恃尚勝每作書字有不解不以問人皆以意造焉

後魏趙郡王幹為都督冀定瀛三州諸軍事孝文詔以李憑為長史唐茂為司馬盧尚之為諮議參軍以佐之而憑等諫諍幹殊不納

劉昶為大將軍征義陽昶嚴暴治軍甚急三軍戰慄無敢言者法曹參軍陽固啟謀并面陳事宜昶大怒欲斬

之

爾朱榮為大將軍稱兵入雒陽私告慕容紹宗曰雒中
人士繁盛驕侈成俗若不加除剪恐難制馭吾欲因百
官出迎仍悉誅之爾謂可不紹宗對曰太后臨朝淫虐
無道天下憤惋共所棄之公既身控神兵心執忠義忽
欲殲夷多士謂非良策深願三思榮不從

辛纂為荊州刺史時蠻酋樊伍能破折陽郡纂議欲出
軍討之纂行臺郎中李廣諫曰折陽四面無民唯一城

之地耳山路深嶮表裏羣蠻今若少遣軍則力不能制
賊多遣則減徹防衛根本虛弱脫不如意便大挫威名
人情一去州城難保纂曰豈得縱賊不討令其為患日
深廣曰今日之事唯須萬全但慮在心腹何暇疥癬聞
臺軍已破洪威計不久應至公但約勒屬城使各修完
壘壁善撫百姓以待救兵雖失折陽如棄雞肋纂曰卿
言自是一途我意以為不爾遂遣兵攻之不克而敗諸
將因亡不返城人又密招關西宇文遣都督獨孤如願

率軍潛至突入州城遂至廳閣纂左右唯五六人短兵接戰為賊所擒遂害之

後周賀拔岳仕魏為關西大行臺時欲討曹泥遣都督趙貴至夏州與太祖計事太祖曰曹泥孤城阻遠未足為憂侯莫陳悅怙衆密邇貪而無信必將為患願早圖之岳不聽遂與俱討泥至於河南岳果為悅所害其士衆散還平涼唯大都督趙貴率部曲收岳屍還營

隋崔弘度開皇中為江陵總管高智惠等作亂復以為

行軍總管出泉門道隸於揚素弘度與素品同而年長素每屈下之一旦隸素意甚不平素言多不用素亦容優之

唐馬元規武德初為慰撫山南使時賊帥朱粲新敗鄧州刺史呂子臧率所領數千人與元規并力擊之子臧謂元規曰朱粲新破之後上下危懼一戰可擒如更遷延部衆稍齊力強食盡必死戰於我為患不細也元規不納子臧請以本兵獨戰元規又禁之不得戰俄而粲衆

大至元規懼退保南陽子臧拊膺曰言不見從者今茲坐公死粲果率兵圍之城陷元規遇害

淮安王神通武德初為山東道安撫大使擊宇文化及於魏縣化及不能抗東走聊城神通進兵躡之至聊城會化及糧盡請降神通不受其副使黃門侍郎崔幹勸納之神通曰兵士暴露已久賊計窮糧盡尅在日暮正當攻取以示國威散其玉帛以為軍賞若受降者吾何藉手乎幹曰今建德方至化及未平兩賊之間事必危

迫不攻而下之此勲甚大今貪其玉帛敗無日矣神道
怒囚幹於軍中既而士及自濟北魏之化及軍稍振遂
拒戰神道督兵薄而擊之貝州刺史趙君德攀堞而上
神道心害其功因止軍不戰君德大詬而下城又堅守
神道乃分兵數千人往魏州取攻具中路復為莘人所
敗建德軍且至遂引軍而退後三日化及為建德所虜
賊勢益張山東城邑多歸建德神道兵漸散退保黎陽
依徐勣俄為建德所陷

高祖令神道持節安撫趙魏擊
宇文化及於魏縣化及不能抗

走聊城神通兵躡之秘書丞魏徵謂神通曰化及今據
聊城莒人為其固守若兵至而莘不降即宜改取但拔
莘縣聊城益懼因而迫之易同俯拾未若以攻具自隨
一足威敵二不乏用如其不然兵至莘城見無攻具必
不下矣不能克莘而遠迫化及恐亦勞而無功化及若
不即降攻之旬月可陷莘人阻我糧運士及為之外援
恐非計之善者神通
不從軍次莘果不下

失士心

士為曰禮樂慈愛戰所蓄也申叔時曰德以施惠戰所
由克是知將帥之道師克在和士卒之心理不可失善
為將者動之以善濟之以仁惠洽投醪恩均挾纊反是

道者鮮不敗焉夫同甘苦共勞逸多禮下士善撫勤恤
此將帥之易也蹈城湟冒鋒刃捐捨親戚不顧軀命此
士卒之難也去其所易要其所難而冀謀夫竭其才勇
士罄其命不亦難哉

陳勝字涉陽城人

地里志屬汝南郡

吳廣字叔陽夏人也

地里志屬

淮陽夏音工雅切

勝少時與人傭耕

與人與人俱也傭耕言受其雇直而為之耕言賣工

傭輟耕之壟上

輟止也之往也壟上謂田中之高處

悵然甚久曰苟富貴

無相忘

但一人富貴不問彼此皆不相忘也

傭者笑而應曰若為傭耕何

富貴也勝太息曰嗟乎燕雀安知鴻鵠之志哉

鴻大鳥也水居

鵠黃鵠也一舉千里鵠音胡督切

秦二世元年勝立為陳王勝王凡六

月其御莊賈殺勝以降秦勝初為王故人嘗與傭耕者

聞之乃之陳叩宮門曰吾欲見涉宮門令欲縛之自辨

數乃置

辨數謂自分別其姓名也并歷道與涉故舊之時舍而不縛也數音山羽切

不肯為

遁勝出遮道而呼涉

呼謂大喚也音火故切

迺召見載與歸入宮

見殿屋帷帳客曰夥涉之為王沈沈者

夥音禍沈沈宮室深遠也沈音

長舍地

楚人謂多為夥故天下傳之夥涉為王繇陳涉始

客出入愈益發舒言勝故情或言客愚無知專妄言輕
威勝斬之諸故人皆自引去繇是無親勝者以朱防為
中正胡武為司過主司羣臣諸將徇地至今之不是者

繫而罪之以苛察為忠其所不善者不下吏輒自治

不以

付吏而房勝信用之諸將以故不親附此其所以敗也
武自治之

晉新蔡王騰鎮鄴為羣盜汲桑等攻陷而死騰性儉嗇
無所振惠臨急乃賜將士米可數升帛各丈尺是以人
不為用

周札為右衛將軍會稽內史為王敦所襲見殺札性貪財好色惟以業產為務兵至之日庫中有精仗外白以配兵札猶惜不與以弊者給之其鄙吝如此故士卒莫為之用

謝萬為豫州刺史領淮南太守監司豫冀并四州軍事既受任北征矜豪傲物嘗以嘯詠自高未嘗撫衆兄安深憂之自隊主將帥已下安無不慰勉謂萬曰汝為元帥諸將宜數接對以悅其心豈有傲誕若斯而能濟事

也萬乃召集諸將都無所說直以如意指四坐云諸將皆勁卒諸將益恨之

苟晞為征東大將軍假節都督青州諸軍事領青州刺史晞刑政苛虐遼西閭亭以書固諫晞怒殺之繇是衆心稍離莫為致用加以疾疫饑饉其將溫叢傅宣皆叛之石勒攻陽夏臧王讚馳襲蒙城執晞

宋殷孝祖為冠軍負其誠節凌鑠諸將臺軍有父子兄弟在南者孝祖并欲推治繇是人情乖離莫樂為用

汝南侯堅侯景圍城堅屯太陽門終日沉飲不撫軍政
吏士有功未嘗申理疫癘所加亦不存恤士咸憤怨堅
書佐董勛華白曇朗等以繩引賊登樓城遂陷堅遇害
後魏侯莫陳悅為秦州刺史時賀拔岳督關中出帝永
熙三年正月岳召悅共討靈州悅誘岳斬之岳左右奔
散悅遣人安慰云我別稟意旨正在一人諸軍無怖衆
皆畏伏無敢拒違悅心猶豫不即撫納乃還入隴止永
雒城岳之所部聚於平涼規還圖悅

北齊邸珍字寶安本中山上曲陽人也從神武起義為
尚書右僕射大行臺節度諸軍事彭城珍御下殘酷衆
士離心為民所害

唐陳政為梁州總管山東道安撫副使行至汲縣為其
部下蘭威所殺擁固其首投於東都王世充梟之城外
政恃才輕物馭下嚴刻故及於難

羅士信為新安道行軍總管恃法嚴暴無問親友必皆
斬之繇是下不附而畏之

郭英乂為劍南節度使英乂暴虐人不堪命為西山兵馬使崔旰以麾下五千眾反討英乂英乂出軍拒之遂奔於簡州州人斬首以送旰遂并屠其妻子

張鎰為鳳翔節度使德宗將幸奉天鎰竊知之將迎鑾駕具財貨服用獻行在李楚琳者嘗事朱泚得其心軍司馬齊映等密謀曰楚琳不去必為亂乃遣楚琳屯於隴州楚琳知其謀乃託故不時發鎰始以迎駕心憂惑以為楚琳承命去矣殊不促其行鎰修飾邊幅不為軍

士所悅是夜楚琳遂與其黨王玠李卓牛僧伽等作亂
鎰夜絕而走出鳳翔三十里及二子皆為候騎所得楚
琳俱害之

殷仲卿為商州刺史充本州防禦使為部下兵馬使劉
洽所殺仲卿馭下無政威惠不行故及於難

韓遊瓌為邠寧節度使初遊瓌入覲其將吏以遊瓌子
謀大逆又軍府無政謂必受代餞送之禮多闕及遊瓌
至京見德宗德宗特達委用因請築豐義城以備寇且

使歸鎮軍中多懼遊瓌以大將范希朝素整肅有聲畏其逼已迴至鎮求其過將殺之故希朝懼而奔帝因召赴京師及遊瓌遣士衆築豐義城兩板而潰寧州戍卒數百縱掠而叛其無方畧失士心如此

李融為鄭滑節度初融疾甚召其副使鄭州刺史趙植將委以後事植既至軍士頗不悅偏將張良率所領二百入劫庫兵授甲以攻中城城中率宿兵千餘人拒之城門將張粲自後擊之大將宋朝晏率兵又至良兵敗

驅其餘衆及家屬夜濟河走衛州融驚駭明日卒

程懷直為橫海軍節度使懷直出畋宿於野數日不恤
軍士軍士頗凍餒大將程懷信懷直之從父兄也因衆
怒遂閉門不納懷直奔赴闕

王佖為朔方靈鹽節度使佖在鎮無智術以馭下居嘗
猜忌乃多殺人以懼之衆益不附及召至踰月而授以
諸衛將軍

李進賢為振武節度使初進賢領使事怠於恤下判官

嚴澈年少用事以刻剝為能邊軍苦之初迴鶻之上礮
鵜泉也振武發營將楊遵憲以五百騎赴於東受降城
所給資糧其價多不實及至鳴砂其將屋宿而師衆暴
露軍士益忿至夜各負一束薪積將舍而焚之卷甲而
還進賢既令歸次而漏其責言下益不安遂燔城門而
攻進賢進賢既帥左右射之不能止乃縋而亡

李瓚為桂管觀察御軍無政為卒所逐貶死

韋士宗貞元中為黔南觀察使黔中宴後將傅近何遽

等作亂逐出土宗蓋士宗苛刻軍州不安奔赴施州

王遂為沂州刺史沂充海等州觀察使遂性狷忿不存大體而軍州民吏久染汙俗率多獷戾而遂數因公事訾罵將卒曰反虜將卒不勝其忿牙將王弁乘人心怨怒遂方宴集弁譟集其徒害遂於席判官張敦實李鉅甫等同遇害

韓全義為神策行營節度長武城使代韓潭為夏綏銀宥節度詔以長武兵赴鎮全義貪而無勇短於撫御制

未下軍中知之相與謀曰夏州沙磧之地無耕蠶生業
盛夏移徙吾所不能是夜戍卒鼓譟為亂全義踰城而
免殺其親將王栖嵩趙虔曜等賴都虞候高崇文誅其
亂首而止全義方獲赴鎮

李道古為鄂岳都團練使時吳元濟叛道古攻申州剋
其羅城乃進攻其城中城守卒夜帥婦人登城而呼懸
門竊發分出其衆道古之衆驚亂多為虜殺初李聽守
安州未嘗退衄及道古誣奏聽移去之乃自帥兵出穆

陵關士卒驕惰賜給多闕其度支供軍錢道古半以奉
權倖半以沒已士皆怨怒不肯力戰賊亦易道古以羸
兵抵之故道古前後再攻破申州外城而不能拔

盧坦為劍南東川節度使在鎮三年後請收閏月軍吏
糧料以助行營人多非之

李愿為宣武節度使先是張弘靖為汴帥屢以厚賞安
士心及愿之至帑藏耗矣而愿恣其奢侈門內數百口
皆仰給官司不恤軍政賞賚既不及弘靖時又娼於酒

色不親政事以嚴刑馭下人心皆怒愿復令其妻弟竇
緩領親兵宿直衙內緩素驕恣黷貨無厭兵士忿之於
是宿直將李臣則薛志忠秦鄰等三人因人之心結謀
為亂夜取宿直刀入竇緩帳斬其首因大呼衙內聞而
響應遂叩愿門愿與一子及左右十數人露髮而走登
於城北樓懸縋而下越濠水得及外城復踰而逸比曉
行十餘里遇野人以驢負薪賣於城者愿奪而乘之馳
入鄭州界亂兵求愿不得殺其妻竇氏三子伏匿得免姬

妾三十餘人軍士分取焉又殺其私媵奴僕二十餘人
張弘靖代劉總盧龍軍節度使弘靖之入幽州也薊人
無老幼男女皆夾道而觀焉河朔軍帥冒寒暑多與士
卒同無張蓋安輿之別弘靖久富貴又不知風土入郡
之時遂肩輿於三軍之中薊人頗駭之弘靖又以祿山
思明之亂始自幽州欲於事初盡革其俗乃發祿山墓
毀其棺柩人尤失望從事有韋雍張宗厚數輩復輕肆
嗜酒嘗夜飲醉歸燭火滿街前後呵叱薊人所不習之

事又雍等詬責吏卒多以反虜名之薊人不勝其憤遂相率以叛囚弘靖於薊門館執韋雍張宗厚輩數人皆殺之

杜元穎出相為西川節度使減削軍食以務畜取人頗苦之於西南兩路防守戍卒悉大為減省衣糧給與又不以時代其戍卒饑寒者反取給於蠻戎成都府動靜好惡蜀人反為蠻之鄉導以是寇及子城元穎方覺知蠻帥恣為俘劫數日而去

後唐李克恭為昭義節度使人士離心時武皇初定邢
雒三州將有事於河朔大蒐軍實潞州有後院軍馬之
雄勁者克恭選其五百人獻於武皇軍使安建惜其兵
不悅克恭令裨校李元審安建紀綱馮霸部送太原行
次銅鞮縣馮霸劫衆謀叛殺都將劉果縣令戴勞謙循
山而南北及沁水有衆三千

冊府元龜卷四百三十七

欽定四庫全書

冊府元龜卷四百三十八 宋 王欽若等 撰

將帥部

無功 奔亡

無功

夏書曰愛克厥威允罔功是知典國兵柄為人司命苟
泥於膠柱之說必坐致輿尸之凶然而雄不竝立戰乃
危事客主之勢勝負交變若乃中人之將僅呼兒戲謀

不慮始事或過舉雖非敗乃大事抑以挫乎國威其有
夙負能名克貞師律練攻守之術習鬪擊之技或以天
時弗順地利非便強弱異態遠近不屬而能按隊以退
承詔而還始守重閉之方庶免喪師之咎因是降黜亦
無負於士衆焉

庶頗為趙將奔魏楚聞之因使人迎頗頗一為楚將無
功

漢李息事景帝至武帝立八歲為材官將軍軍馬邑後

六歲為將軍出代後三歲為將軍從大將軍出代後三歲為將軍從大將軍出朔方皆無功

李廣元朔六年為將軍出定襄諸將多中首虜率為侯

者中猶充也充本法得首若干封侯也率謂軍功封賞之科著在法令者也中音竹仲反其下率亦同而

廣軍無功

郭昌元封四年以大中大夫為拔胡將軍屯朔方還擊

昆明無功奪印

公孫敖為因杆將軍天漢元年出河西與強弩都尉會

涿邪山亡所得

李廣利為貳師將軍天漢三年將六萬騎步兵七萬出朔方強弩都尉路博德將萬餘人與貳師會游擊將軍韓悅步兵三萬人出五原

即韓說也

因杆將軍敖將騎萬步

兵三萬人出鴈門匈奴聞悉遠其累重于余吾水北

累重

謂妻子資產也累力瑞切重音直用切

而單于以十萬騎待水南與貳師

接戰貳師解而引歸與單于連鬪十餘日游擊亡所得因杆與左賢王戰不利引歸至征和三年遣貳師將軍

七萬人出五原御史大夫商丘成將三萬餘人出西河

重合侯莽通將四萬騎出酒泉千餘里單于聞漢兵大

出悉遣其輜重徙趙信城北邸邳居水

邸音丁禮反
邳音之日反

賢王驅其人民渡余吾水六七百里居兜銜山單于自

將精兵左安侯渡姑且水御史大夫軍至追邪徑無所

見還

從疾道而追之不見虜
而還也邪音似嗟反

匈奴使大將與李陵將三

萬餘騎追漢軍至浚稽山合轉戰九日漢兵陷陳卻敵

殺傷虜甚衆至蒲奴水虜不利還去重合侯軍至天山

匈奴使大將偃渠與左右呼知王將二萬餘騎要漢兵見漢兵強引去重合侯無所得失

後漢王霸建武九年為討虜將軍與吳漢及橫野大將軍王常建義大將軍朱祐破姦將軍侯進等五萬餘人擊盧芳將賈覽閔堪于高柳匈奴遣騎助芳漢軍遇雨戰不利吳漢還雒陽令朱祐屯常山王常屯涿郡侯進屯漁陽璽書拜霸上谷太守領屯兵如故霸又與驃騎大將軍杜茂會攻盧芳將尹繇于崞繁時不尅

馬援建武十九年將三千騎出高柳行鴈門代郡上谷障塞烏桓候者見漢軍至虜遂散去援無所得而還

任尚為征西校尉安帝永初元年先零別種滇零與鍾羌諸種大為寇掠郡縣不能制遣車騎將軍鄧騭與尚擊之騭尚軍大敗遂寇抄三輔朝廷以鄧太后故迎拜騭為大將軍封尚樂亭侯食邑三百戶三年春復遣其騎都尉任仁督諸郡屯兵救三輔仁戰每不利衆羌乘勝漢兵數挫當煎勒姐種攻沒破羌縣鍾羌又沒臨洮

縣生得隴西南部都尉明年春滇零遣人寇褒中燔燒
郵亭大掠百姓于是漢中太守鄭勤移屯褒中軍營久
出無功有廢農桑又詔任尚將吏兵還屯長安罷遣南
陽潁川汝南吏士五年春任尚坐無功徵免

馮煥為幽州刺史建元元年正月率二郡太守討高句
驪濊貊不克

任涉初為涼州從事順帝陽嘉三年刺史益他遣涉將
燉煌兵五百人與戊巳司馬曹寬西域長史張宴將焉

者龜茲車師前後部合三萬餘人討疏勒攻楨中城四十餘日不能下引去其後疏勒王連相殺害朝廷亦不能禁

董卓靈帝時拜為東中郎將討先零羌竝不尅又與北中郎將盧植討張角竝無功而還

魏曹真為大司馬以蜀連出侵邊境宜遂伐之數道竝入可大克也真發長安從子午道南入司馬宣王沂漢水當會南鄭諸軍或從斜谷道或從武威入會大霖雨

三十餘日棧道斷絕明帝詔真還軍

蜀姜維為衛將軍後主延熙十六年夏率軍數萬人出石營經董亭圍南安魏雍州刺史陳泰解圍至雒門維糧盡退還十八年出狄道住鍾題十九年春就遷大將軍二十年魏征東大將軍諸葛誕反于淮南分關中兵東下維欲乘虛向秦川復率數萬人出駱谷徑至沈嶺時長城積穀甚多而守兵乃少聞維方到衆皆惶懼魏大將軍司馬望拒之鄧艾亦自隴右督軍于長城維前

駐亡水皆倚山為營望艾傍渭堅圍維數下挑戰望艾不應景耀元年維聞誕破敗乃還成都

吳呂岱為昭信中郎將漢建安十六年岱督郎將尹異等以兵二千人西誘漢中賊帥張魯到漢興塞城魯嫌疑斷道事計不立大帝遂召岱還

朱然為車騎將軍右護軍嘉禾三年大帝與蜀克期大舉大帝自向新城然與全琮各受斧鉞為左右督會吏士疾病故未攻而退

諸葛恪為太傅荆揚州牧督中外諸兵大元二年三月率兵伐魏四月圍新城大疫兵卒死者大半秋八月恪引兵退初恪欲出兵諸大臣同辭諫恪不聽違衆出兵大發州郡二十餘萬衆百姓騷動恪圍新城攻守連月城不拔士卒疲勞因暑飲水水泄下流病腫者大半死傷塗地魏知戰士罷病乃進救兵恪引兵而去士卒傷病流曳道路或頓仆坑壑或見略獲存亡忿痛大小嗟呼而恪晏然自若詔召相銜徐乃旋師

陸抗為鎮軍將軍景帝永安七年三月與撫軍步協征西將軍劉平建平太守盛曼率衆圍蜀巴東守將羅憲魏使將軍胡烈步騎二萬侵西陵以救憲抗等引軍還丁奉為右大司馬左軍師吳孫皓建衡元年帥衆治徐塘因攻晉穀陽穀陽民知之引去奉無所獲吳主怒斬奉導軍

李勗為監軍建衡元年吳主遣監軍虞汜威南將軍薛瑛蒼梧太守陶璜由荊州勗與督軍徐存從建安海道

皆就合浦擊交趾二年春勗以建安道不通利殺導將
馮斐引軍還

晉段匹磾為幽州刺史推并州刺史劉琨為大都督同
討石勒歃血載書檄諸防守俱集襄國琨匹磾進屯固
安以俟衆軍匹磾從弟末杯納勒厚賂獨不進乃阻其
計琨匹磾以勢弱而退

毛穆之為右將軍西蠻校尉益州刺史領建平太守假
節戍巴郡以子球為梓潼太守穆之與球伐苻堅至于

巴西郡以糧運乏少退屯巴東病卒

宋劉敬宣為冠軍將軍晉安帝義熙中高祖表遣敬宣率兵五千伐蜀既入峽分遣振武將軍巴東太守溫祚以二千人揚聲外水自率益州刺史鮑陋輔國將軍文處茂龍驤將軍時延祖由墊江而進敬宣率先士卒轉戰而前達遂寧郡之黃虎去成都五百里偽輔國將軍譙道福等悉衆拒嶮相持六十餘日大小十餘戰賊固守不敢出敬宣不得進食糧盡軍中多疾疫死者大半

引軍退

張興世為遊擊將軍海道北伐假輔國將軍加節置佐無功而還

劉道產為長沙王道憐驃騎將軍時廣州羣盜因刺史謝道欣死為寇攻沒州城道憐加道產振武將軍南討會叔父謙之已平廣州道產未至而反

南齊垣崇祖初仕宋為輔國將軍行徐州事徙戍龍沮龍沮在朐山南崇祖啓斷水注平地以絕虜馬明帝以

問劉懷珍云可立崇祖率將吏塞之未成魏主謂彭城鎮將平陽公曰龍沮若立國之耻也以死爭之數萬騎掩至崇祖馬繫陷陣不能抗乃築城自守會天雨十餘日魏兵乃退龍沮竟不立

劉懷珍初仕宋為輔國將軍太始初青州刺史沈文秀拒命明帝遣其弟文炳宣諭使懷珍領馬步三千人隨文炳俱行未至薛安都引虜人寇徐兗已沒張永沈攸之于彭城大敗勅懷珍步從盱眙自淮陰濟淮救永等

而官軍為虜所逐相繼奔歸懷珍乃還

王廣之為左軍將軍太祖建元元年魏軍動詔假廣之節駐淮上廣之家在彭沛啟求招誘鄉里部曲北取彭城帝許之以廣之為使持節都督淮北軍事平北將軍徐州刺史廣之引軍過淮無所尅獲坐免官

陳胡穎仕梁為豫章內史隋高祖鎮京口高祖圍廣陵齊人東方老據宿豫請降以穎為五原太守隨杜僧明援廣陵不尅退還除曲阿令

陳詳為宣城太守王琳下據柵口詳隨吳明徹襲湓城
取琳家口不尅因入南湖自鄱陽步道而歸琳平詳與
明徹竝無功

蕭摩訶宣帝太建中自淮南徵還授右衛將軍十一年
周兵寇壽陽詔摩訶與樊毅等衆軍赴援無功而還
後魏李粟道武時為左將軍慕容寶棄中山東走粟以
輕騎追之不及而還

古弼為安西將軍與水昌王建等討馮文道文道嬰城

固守弼芟耒而還

羅伊利孝文時為安東將軍蠕蠕來寇詔伊利追擊之不及而反

劉昶孝文時為南齊雍州刺史曹虎之詐降也詔昶以兵出義陽無功而還

張滿為南中郎將南蠻校尉隸平南大將軍長孫嵩往禦晉師及宋武帝入長安乃還後從安平公叔孫建攻青州不克而還

皮豹子為內都大官先是河西諸胡亡匿避命豹子及前涇州刺史封阿君督河西諸軍南趣石樓與衛大將軍樂安王良以討羣胡豹子等與賊相對不覺胡走無捷而還坐免官

楊椿為安東將軍宣武永平初徐州彭城人成景携以宿豫叛詔椿率衆四萬討之不尅而返

淳于誕為伐蜀別部司馬領鄉導統軍師次晉壽蜀人大震屬宣武宴駕不果而還

伊盆生孝明時為持節右將軍雒州刺史與荊州刺史淮南王世遵魯陽太守崔模俱討襄陽不尅而還坐免官

穆紹孝莊時為尚書令司空公加侍中爾朱榮之討葛榮也詔上黨王天穆為前鋒次於懷縣司徒公楊椿為右軍紹為後繼未發會擒葛榮乃止元顥入雒以紹為兗州刺史行達東郡顥敗而返

席法友為冠軍將軍梁將楊公則寇揚州假法友征虜

將軍以討之法友未至而公則敗走後假法友前將軍持節為別將出淮南解朐山之圍法友始渡淮而朐山敗沒遂停散十年

後周董紹為御史中尉進策請圖梁漢以紹為行臺梁州刺史閣內都督趙剛以為不可而朝議已決遂出軍紹竟無功還免為庶人

田弘為驃騎大將軍武帝天和二年陳湘州刺史華皎來附弘從衛公直赴援與陳人戰不利仍以弘為江陵

總管及陳將吳明徹來寇弘與梁王蕭歸退保總南令副總管高琳拒守明徹退乃還江陵

賀若敦為驃騎大將軍討陳將侯瑱侯安都于湘州相持歲餘瑱等不能制求借船送敦渡江敦慮其或詐拒而弗許瑱復遣使謂敦曰驃騎在此既久今欲給船相送何謂不去敦報云湘州是我國家之地為爾侵逼敦來之日欲相平殄既未得一決所以不去瑱後日復遣使來敦謂使者云必須我還可捨我百里當為汝去瑱

等留船于江將兵去津路百里敦覘知非詐徐理舟楫
勒衆而還

隋閻毗為殿內少監從煬帝征遼東帝班師兵部郎中
斛斯政奔遼東帝令毗率騎二千追之不及政據高麗
栢崖城毗攻之二月有詔徵還

周羅睺當遼東之役徵為本軍總管自東萊汎海趣平
壤城遭風船多飄沒無功而還

段文振為行軍總管率衆出廬州道以備胡虜無功而

還

杜整為左武衛將軍突厥犯塞詔遣衛王爽總戎北伐以整為行軍總管兼元帥長史至合川無虜而還

唐蘇定方為左驍衛大將軍高宗龍朔三年二月定方頓兵于平壤城下高麗久不送款屬大雪泥濘遂解圍勒兵而退

張敬則為鳳翔節度使嘗慨然有復河湟志大將野詩良輔潛發銳卒至隴西蕃戎大駭屬風雨暴至無功而

還方更圖進取德宗慮其財力不足密詔止之

馬燧德宗建中三年為魏州大都督府長史兼魏博澶
相四州節度觀察招討等使田悅朱滔王武俊兵亦至
魏縣與官兵隔江對壘三盜於魏縣軍中遞相推獎王
號朱滔稱冀王田悅稱魏王王武俊稱趙王又遣使于
李納納稱齊王四盜共推淮西李希烈為天下兵馬元
帥太尉建興王皆偽署官號如國初行臺之制而名目
頗有妖僻者然未敢偽稱年號而五盜合從圖傾社稷

兩河鼎沸寇盜橫行燧等雖志在勤王竟莫能助勦患
難四年十月涇師犯闕帝幸奉天燧引軍還太原

嚴綬為荆南節度使憲宗元和九年吳元濟叛朝議加
兵以綬有弘恕之稱可委以戎柄乃授山南東道節度
使尋加淮西招撫使綬自帥師壓賊境無威略以制寇
到軍日遽發公藏以賞士卒累年蓄積一旦而盡又厚
賂中貴人以招聲援師徒萬餘閉壁而巳經年無尺寸
功裴度見帝屢言綬非將帥之才不可責以戎事乃拜

太子少保

范希朝元和中為河東節度等使太原尹北都留守率師討鎮州無功既耄且病事不治除左龍武軍統軍

袁滋為彰義軍節度隋唐鄧申光觀察使逆賊吳元濟與官軍對壘數年滋竟以淹留無功貶撫州刺史

後唐袁象先初仕梁為天平軍兩使留後梁祖北征以象先為鎮定東南行營都招討應接副使令兵攻舊縣不克而還

劉訓為襄州節度使明宗天成中荆南高季興叛詔訓為南面行營招討使知荆南行府事是時湖南馬殷請以舟師會及師至荆渚殷軍方到岳州仍專意于訓許助軍儲弓甲之類久之略無至者荆渚地氣卑濕漸及霖潦糧運不繼人多疾疫訓本無將略人咸苦之及招討使孔循至得襄州小校竹龍之術乃造竹龍二道傳於城下竟無所濟遂罷兵領將士散略居民而迴詔訓赴闕尋責授澶州刺史

安從進為延州節度使長興四年秋進攻夏州初王師
既攻夏州州城即赫連勃勃之故城也父老相傳云勃
勃蒸土築之王師數道攻擊從進穴地道至其城下如鐵石
攻擊不能入李彝超昆仲登城謂從進曰孤弱小鎮不
勞王師攻取虛煩國家餉運得之不武為僕聞天乞容
改圖而又党項部族萬餘騎薄我糧運而野無芻牧關
輔之人運斗粟東橐動計數千窮民泣血無所控訴復
為蕃部殺掠明宗聞其若此乃命班師

周王峻為樞密使廣順元年河東劉崇與契丹圍晉州命峻為行營都部署至陝駐留數夕劉崇攻晉州甚急太祖憂其不守及議親征取澤州路入與峻會合先令諭峻峻遣驛騎馳奏請不行幸時已降御札行有日矣會峻奏至乃止峻軍已過絳郡拒平陽一舍賊軍燔營狼狽而遁峻入晉州或請追賊必有大利峻猶豫久之翊日方遣騎軍襲賊信宿而還向使峻極力追躡則并汾之孽無噍類矣峻亦深耻無功計度城平陽而迴

奔亡

若夫膺蔡戰之賜叅爪牙之任值四方之多事當萬乘
之注意或時危勢促計窘途窮潛假息於隣邦乃苟生
於異域雖奔亡之一貫在心迹則各殊若乃合謀而真
扶宗室唱義而將除巨猾摧鋒陷陣致權貴之不平迨
叛失利為強敵之見迫此皆理或可哀事非獲已至如
萌疑忌之心避誅夷之患兵折勢窘携妻子而去糧盡
力殫與溝瀆為期此故為盡節之士所笑死難之夫攸

耻其餘瑣瑣何足算哉

後漢呂布為中郎將與王允既殺董卓允以布為奮威將軍假節儀同三司封溫侯允既不赦涼州人由是李傕等還攻長安布不能拒乃將數百騎出武關奔南陽袁術待之甚厚布自恃殺卓有德袁氏遂恣兵抄掠術患之布不安復去從張楊於河內時李傕等購募求布急楊部下諸將皆欲圖之布懼謂楊曰與鄉州里今見殺其功未必多不如生賣布可大得傕等爵寵楊

以為然有頃布得走投袁紹紹與布擊破張燕布既恃其功更請兵于紹紹不許而將士多暴橫紹患之布不自安求還雒陽聽之承制使領司隸校尉遣壯士送布而陰使殺之布疑其圖已乃使人鼓箏于帳中潛自遁出夜中兵起而布已亡紹聞懼為患募遣追之皆莫敢逼遂歸張楊道經陳留太守張邈邈遣使迎之以為兗州牧據濮陽郡縣皆應唯鄆城東阿范為太祖守太祖引軍還與布戰于濮陽太祖軍不利相持百餘日是時

歲旱蝗蟲少穀百姓相食布東屯山陽二年間太祖乃盡復收諸城擊破布于鉅野布東奔劉備布見備甚敬之謂備曰我與卿同邊地人也布見關東起兵欲誅董卓布殺卓東出關東諸將無安布者皆欲殺布耳請備于帳中生牀上令婦向拜酌酒飲食名備為弟備見布語言無常外然之而內不悅

魏文欽為廬江太守冠軍將軍時司馬宣王已誅曹爽欽夷邑人乃進欽為前將軍以安其心後代諸葛誕為

揚州刺史自曹爽之誅欽嘗內懼與諸葛誕相惡無所
與謀會誕去郡毋丘儉往乃陰共結謀戰敗走晝夜間
行追者不及遂得入吳吳以欽為都護假節鎮北大將

軍幽州牧譙侯

欽降吳表曰命稟不幸嘗隸魏國兩絕於天下側伏偶都自知無路司馬師滔

天作逆廢害二主卒矣高莽惡不足踰欽累世受魏恩
烏鳥之情竊懷憤踊在三之義期于斃仆前與毋丘儉
郭淮等俱舉義兵當共帥師掃除凶孽誠以懷悽愚管
所執智慮淺薄微節不騁進無所依悲痛切心退惟不
能扶翼本朝抱愧俛仰靡所自厝冒緣古義固有所歸
庶假天威得展萬一僵仆之日亦所不恨輒相率將歸
命聖化慙偷苟生非辭所陳謹上還所受魏使
持節前將軍山桑侯印綬臨表惶惑伏須罪誅

夏侯霸為征蜀護軍時征西將軍夏侯玄於霸為從子而玄于曹爽為外弟及司馬宣王誅爽遂召玄霸聞爽被誅而玄又徵以為禍必轉相及心既內恐又霸先與雍州刺史郭淮不和而淮代玄為征西霸尤不安故遂奔蜀南趣陰平而失道入窮谷中糧盡殺馬步行足破卧巖石下使人求道未知何之蜀聞之乃使人迎霸晉牽秀司空張華請為長史後張昌作亂長沙王又遣秀討昌秀出關因奔成都王穎

孫惠為廣武將軍時元帝遣甘卓討周馥于壽陽惠乃率眾應卓馥敗走廬江何銳為安豐太守惠權留郡境銳以他事收惠下人推之惠既非南朝所授嘗慮讒間因此大懼遂攻殺銳奔入蠻中

劉隗為鎮北將軍督青徐幽平軍事時王敦作亂以討隗為名詔徵隗還京師百官迎之于道隗岸幘大言意氣自若及入見與刁協奏請誅王氏不從有懼色率眾屯金城及敦尅石頭隗攻之不拔入宮告辭帝雪涕與

之別隗至淮陰為劉遐所襲攜妻子及親信二百餘人奔于石勒勒以為從事中郎太子太傅

劉敬宣為輔國將軍與其父牢之謀襲桓玄不克牢之死敬宣奔喪哭畢即渡江就司馬休之高雅之等懼奔雒陽往來長安各以子弟為質求救于姚興興與之符信令關東募兵得數千人復還至彭城間收聚義故玄遣孫無終討冀州刺史劉軌軌要敬宣雅之等共據山攻之不克又進昌平澗戰不利衆各離散乃俱奔後燕

袁虔之為輔國將軍時桓玄輔政虔之乃與寧朔將軍
劉壽冠軍高長慶龍驤將軍郭恭等奔于後秦姚興臨
東堂引見謂虔之等曰桓玄雖名晉臣其實晉賊其才
度定何如父也能辦成大事不虔之曰玄藉世資雄據
荆楚屬晉朝失政遂偷竊宰衡安忍無親多忌好殺位
不才授爵以愛加無公平之度不如其父遠矣今既握
朝權必行篡奪既非命世之才正可為他人驅除耳此
天以機便授之陛下願速加經略廓清吳楚興大悅以

虔之為大司農餘皆有拜授虔之固讓請疆場自效改授假節寧南將軍廣州刺史

桓謙玄之從兄也為西中郎將荊州刺史玄篡位封新安王及桓振作亂謙初勸振率軍下戰以守江陵振既輕謙用事故不從及振敗謙奔于姚興先是譙縱稱藩于姚興縱與盧循通使潛相影響乃表興請謙共順流東下興問謙謙曰臣門著恩荆楚從弟玄雖曾篡位皆是逼迫人神所明今臣與縱東下百姓自應駭動興曰

小水不容大舟若縱才力足以濟事亦不假君為鱗翼
宜自求多福遂遣之謙至蜀欲虛懷引士縱疑之乃置
謙于龍格使人守之謙向諸弟泣曰姚王之言神矣後
與縱弟譙道福俱下謙于道召募百姓感其父冲遺惠
投者二萬人劉道規破謙斬之

桓謐為左衛將軍時宋高祖誅桓玄迎復安帝謐與臨
原王桓怡雍州刺史桓蔚中書令桓裔將軍何澹之等
奔于後秦姚興

馬敬為寧朔將軍梁州刺史荆州司馬休之襄州魯宗之為宋高祖所敗敬遂與譙王文思新蔡王道賜輔國將軍竟陵太守魯輔寧朔將軍南陽太守魯範奔于後秦

魯宗之為竟陵太守自以非宋高祖舊隸屢建大功有自疑之心會司馬休之見討猜懼益甚遂與休之合軍敗還襄陽因與休之北奔善于撫御士民皆為盡力衛送出境盡室入後秦

苻丕為前秦將鎮鄴為燕慕容垂攻之丕棄鄴城奔于并州

慕容垂為前燕征南將軍大敗桓溫等師既有大功威德彌振慕容評素不平之垂又告其將孫蓋等推鋒陷銳宜論功超授評寢而不錄垂數以為言頗與評廷爭後評謀殺垂垂懼奔于苻堅

欽成為後秦後將軍時貳縣羌叛姚興遣成與鎮軍彭白狼北中郎將姚維都討之成敗甚懼詣趙興太守姚

穆歸罪穆欲殺之成怒奔赫連勃勃

梁張綰高祖太清二年為左衛將軍會侯景寇至入守東掖門三年臺城陷綰出奔外轉至江陵湘東王承制授侍中左衛將軍相國長史

王僧辯為衛將軍都督東土諸軍事陳侯瑱鎮豫章僧辯使其弟僧愔率兵與瑱共討蕭勃及高祖誅僧愔僧陰欲圖瑱而奪其軍瑱知之盡收僧愔徒黨僧愔奔齊樊毅為左衛將軍及西魏圍江陵毅率兵赴援會江陵

陷為岳陽王所執久之遁歸高祖受禪毅與弟猛舉兵
應王琳琳敗毅奔齊

後魏董巒滎陽人太武太平真君末隨父南叛為南齊
寧州刺史孝文時益州內附齊明帝遣巒追討之官
軍進擊執巒并其子景曜送于行宮巒雖自長江外言
語風氣猶同華夏性踈武不多識文字孝文引巒於廷
問其南事巒怖不能對數顧景曜景曜進代父答申敘
齊明篡襲始終辭理橫出言斐而辨孝文異焉以巒為

衛騎校尉景曜為員外郎謀欲南叛坐徙朔州及車駕南討漢陽召巒從軍景曜至雒陽密啟其父必當奔叛軍次魯陽巒單騎南走過南陽新野歷告二城以魏軍當至戒之備防房伯玉劉忌並云無足可慮巒曰不然軍勢甚盛至境首北向哭呼景曜云吾百口在彼事理須還不得顧汝一子也景曜鍊詣行在數而斬之

王神念為潁川太守宣武永平元年正月奔于梁

賀拔勝為驃騎大將軍荊州都督出帝末詔勝統衆北

赴京師軍次汝水出帝入關勝率所部走荊州為侯景所敗率五百餘騎南奔梁

史寧為荊州大都督東魏遣侯景率眾寇荊州寧遂奔梁梁武帝引寧至香磴前謂之曰觀卿風表終至富貴我嘗使卿衣錦還鄉寧答曰臣世荷魏恩位為列將天長喪亂本朝傾覆不能北面逆賊幸得息肩有道儻如明詔欣幸實多因涕泣橫流梁武為之動容

賈顯度為兗州刺史初為爾朱榮所用及榮死度不自

安南奔梁梁厚待之

叱列延慶為定州刺史與爾朱兆等拒義旗于韓陵戰敗延慶與爾朱仲遠走渡口濟仲遠南竄延慶北降齊獻武王王與之入雒從王于并州

北齊斛律平初仕後魏為襄威將軍正光末六鎮擾亂隸大將軍尉賓北討軍敗為賊所虜後走奔其弟金於雲州進號龍驤將軍與金擁衆南出至黃瓜堆為杜雒周所破部落離散乃歸爾朱榮待之甚厚

王則為荆襄六州都督渭曲之役則為西師圍逼遂棄城奔梁梁尋放還神武恕而不責

後周獨孤信為後魏荊州刺史東魏遣其將高敖曹侯景掩至信以衆寡遂率麾下奔梁

蕭世怡梁元帝時為湘州刺史王琳率舟師襲世怡世怡以州輸時陳武帝執政徵為侍中世怡疑不就乃奔于齊

梁朱瑾唐末為兗州節度使兄瑄在鄆州及龐師古陷

鄆州與李承嗣方出兵求芻粟于豐沛間瑾之二子及大將康懷英判官辛綰小校閻寶以城降于師古瑾無歸路即與承嗣將麾下兵走沂州沂州刺史尹處賓拒關不納乃走海州為師古所迫遂擁州民渡淮依楊行密表瑾領徐州節度使

趙明唐末以軍功歷肅峽二州刺史其兄凝領襄州表明為荆南留後未至鎮而朗陵之兵先據其城矣明領兵逐之遂鎮于渚宮天祐二年秋太祖既平襄州遣楊

師厚乘勝趨荆門明懼乃舉族去峽奔蜀王建待以賓禮及建稱帝用為大理卿工部尚書久之卒于蜀

劉知俊為同州節度使奔李茂貞茂貞署荊州節度使後為茂貞左右石簡顯等讒間其軍政茂貞猶子繼崇鎮秦州因來寧覲言知俊途窮至此不宜以讒嫉見疑茂貞乃誅簡顯等以安其心繼崇又請令知俊挈家居秦州以就豐給茂貞從之未幾邠州亂茂貞命知俊討之時邠州都校李保衡納款于朝廷末帝遣霍彥威率

衆先入于邠知俊遂圍其城半載不能下會李繼崇以秦州降于蜀知俊妻孥皆遷於成都遂解邠州之圍而歸岐陽知俊以舉家入蜀終慮猜忌因與親信百餘人夜斬關奔蜀王建待之甚至即授為武信軍節度使

劉嗣彬知俊之族子幼從知俊征行累遷為軍校及知俊叛以不預其謀得不坐貞明末大軍與晉王對壘於德勝久之嗣彬率數騎奔于晉具言朝廷軍機得失又以家世讎怨將以報之晉王深信之即厚給田宅仍賜

錦衣玉帶軍中目為劉二哥居一年復來奔當時晉人謂是刺客以晉王恩澤之厚故不竊發龍德三年冬從王彥章戰于中都軍敗為晉人所擒晉王見之笑謂嗣彬曰爾可還予玉帶嗣彬惶恐請死遂誅之

後唐安元信字子元代北人幼事太祖唐光啓中幽州軍與吐渾赫連鐸合從寇太原頗為憂患太祖征吐渾平之遂入居庸元信時為前鋒遇幽州軍少鬪之不勝太祖性嚴急元信不敢還遂奔定州定帥王處存待之

甚厚用為突騎都校

晉李金全為安州節度使有親吏左都押衙胡漢榮者貪詐殘忍軍府之政一以委之高祖聞其事遣廉吏賈仁沼往代其職且召漢榮漢榮內疚惶怖金全乃列狀稱疾以聞及仁沼至漢榮鳩而殺之天福五年夏高祖命馬全節為安州節度使以代金全漢榮自以昔嘗拒命復聞仁沼二子將訴寘毒之事居不自安乃紿謂金全曰邸吏劉珂使徒步倍道兼行密傳其意云受代之

後朝廷將以仁沼之事詰公之罪金全大駭命從事張
緯函表送款於淮南與其黨數百人束身夜出曉至汝
州引領北望泣下而去及至金陵李昇授以節鎮

尹暉為右衛大將軍范延光據鄴謀叛以暉失意密使
人齎蠟彈以榮利啖之暉得延光文字懼而私竄欲沿
汴水奔於淮南高祖聞之尋降詔招喚未出王畿為人
所殺

皇甫暉少帝開運末為密州刺史戎虜犯闕因掠其部

民以奔至江南江南即遣使具舟楫以迓之行及秦淮
暉心不自安因自投於水沿流百餘步而不沒舟人拯
之而免後人或訊之云初落水如履一大石欲求溺而
不得故獲免焉及至金陵禮遇甚厚偽署為歙州刺史
後遷偽奉化軍節度使

冊府元龜卷四百三十八